

光緒山西通志

名宦錄四

錄一之四

山西通志第一百四

賜進士出身頭品頂戴兵部侍郎兼都察院右副都御史巡撫山西提督軍務臣張煦奉

旨監修

臺司

明隆慶至崇禎
國朝

趙孔昭邢臺人進士隆慶間巡撫山西持大體不責苛細巡
邊往復送迓止於臺前一揖諸司道府縣贖銀責令掛號分
外不博一錢至阨塞險平城障修廢儲糈虛實士馬肥瘠徧
厯三關靡所不周

楊巍字伯謙海豐人嘉靖二十六年進士爲山西僉事參議
分守宣府尋爲陽和兵備副使隆慶初晉右副都御史巡撫
山西所部驛遞銀歲徵五十四萬巍請減四之一修築沿邊
城堡千餘里檄散大盜李九經黨乞養母去

方逢時字行之嘉魚人嘉靖二十年進士隆慶四年正月爲右僉都御史巡撫大同俺答入威遠堡別部攻靖魯伏兵卻之冬俺答孫把漢那吉來降告總督王崇古曰機不可失也遣中軍康綸率騎五百往受之與崇古定計挾把漢以索叛人趙全等遣百戶鮑崇德出雲石堡語俺答部下五奴柱曰欲還把漢則速納款若以兵來是速之死矣五奴柱白俺答邀入營說以執趙全易把漢俺答心動遣火力赤致書逢時而是時全方從臾用兵俺答令子辛愛將二萬騎入左賜堡兄子永邵卜趨威遠堡自率眾犯平虜城逢時曰此必趙全謀也全嘗投書逢時言悔禍思漢欲復歸逢時以示俺答俺答大驚有執全意及戰又不利乃引退辛愛猶未知奄至大同逢時使人持把漢箭示之曰吾已與而父約以報汝辛愛

執箭泣曰此吾弟鐵背合吉故物也我來求把漢把漢既受
官又有成約當更計之乃遣部下啞都善入見逢時曉以大
義犒而遣之辛愛喜因使求幣逢時笑曰台吉豪傑也若納
款方重加爵賞何愛此區區損盛名辛愛大慙復遣啞都善
來謝曰蒙太師教幸甚故將田世威亦讓其使使還報俺答
召辛愛還東行宣府總兵趙計過之復由大同北去巡按御
史姚繼可劾逢時輒通寇使屏人語導之東行嫁禍鄰鎮大
學士高拱曰撫臣臨機設策何可洩也但當觀後効不宜先
事輒易上然之俺答乃遣使定約夜召全等計事卽帳中縛
送大同逢時受之崇古亦送把漢歸逢時以功晉兵部右侍
郎兼右僉都御史甫拜命以憂歸後崇古入理京營神宗問
誰可代者大學士張居正以逢時對萬厯初起故官總督宣

大山西軍務始逢時與崇古共決大計而貢市之議崇古獨成之逢時復代崇古乃申明約信二人首尾共濟邊境遂安累晉兵部尙書兼右都御史總督如故加太子少保五年召理戎政復列上五事又上款貢圖等爲兵部尙書累加少保致仕卒逢時功名與崇古相亞時稱方王

王崇古字學甫蒲州人嘉靖二十年進士喜談兵具知諸邊阨塞隆慶四年正月總督宣大山西軍務禁邊卒闖出而縱其素通寇者深入爲間又檄勞番漢陷寇軍民率眾降及自拔者悉存撫之歸者接踵西番瓦剌黃毛諸種一歲中降者踰二千人冬十月俺答孫把漢那吉來降留之大同慰藉甚至詔授指揮使賜緋衣一襲許俺答互市遂縛叛人趙全等以獻加太子少保兵部尙書遂定封俺答順義王昆都力辛

愛吉能等授官有差崇古乃廣召商販聽令貿易布帛菽粟
皮革遠自江淮湖廣輻輳塞下因收其稅以充犒賞其大小
部長則官給金繒歲市馬各有數崇古仍歲詣宏賜望宣諭
威德諸部羅拜無敢譁自是邊境休息東起遵永西抵嘉峪
七鎮數千里軍民樂業不用兵革詔晉太子太保萬厯初召
理戎政加少保晉兵部尙書致仕卒贈太保諡襄毅崇古獨
任貢市貽五十年太平之福海宇內外胥頌社稷臣爲宣大
總制冠

宋纁字伯敬商邱人嘉靖三十八年進士爲御史隆慶初巡
按山西俺答陷石州將士捕七十七人當斬纁訊得其當釋
者殆半靜樂民李良雨化爲女纁言此陽衰陰盛之象宜進
君子退小人以挽氣運上嘉納之萬厯中爲戶部尙書嘗以

山西連歲荒賴社倉獲濟請推行之天下以俸供爲羅本不足則勸富人或令民輸粟給冠帶上稱善繻仕至吏部尙書卒諡莊敏

邵永春長垣進士隆慶間巡鹽清祿糧以杜奸欺收硝池以弭私販題南陽以復舊轄興書院以羅人才疏河渠以通水利開南塲以便撈採俱功之不可泯者

王世貞字元美太倉人生有異稟書過目終身弗忘嘉靖二十六年進士隆慶中由浙江右參政晉山西按察使有廉能聲母憂歸萬厯中仕至南京刑部尙書世貞始與李攀龍協主文柄攀龍卒獨操其柄二十年才最高地望最顯其續五子篇則陽曲王道行爲首云

栗祁字子登夏津人嘉靖壬戌進士擢山西按察副使因備

兵懷隆去郡父老夾車轂泣送者數千人三年後拜山西參政兩臺交薦大臣閱邊還報稱可大用遂以祁開府北邊爲人豐頤重厚舉止雍容美文詞平恕不苛馭下取寬簡而持已獨嚴所至有廉名以小疾遂不起

秦可大咸甯進士歷山西參議分守口北隆慶二年擢本省副使兵備陽和轉四川副使五年尋陞山西行太僕卿兵備甯武所至皆有政績

許希孟固始人隆慶間分巡大同僉事強幹有威望凜凜以風紀自持當時頌其績者有政如冰霜奸宄消亡之句

艾杞米脂人隆慶間大同分巡道僉事躬自儉約以率僚屬餽遺一無所受人亦卒不敢遺時值邊警杞內紀軍餉外佐戎行境賴以安以勞瘁卒於官

王學謨朝邑人進士隆慶間岢嵐兵備道方正執法不避恩

怨嚴飭武備議築河墻老營諸堡尋陞山東參政

以上隆慶時

侯於趙字宗度嘉靖乙丑進士授平陽府推官清介執法多所平反歷陞山西左布政未幾擢都御史巡撫本省時以順義主俺答物故部落內鬩於趙慮有意外多方宣諭陰爲練兵儲糧之計邊方賴以無虞以母憂去家居十四年而卒

沈子木字汝柑歸安人嘉靖己未進士萬曆乙酉陞山西右布政使丙戌轉左晉中大饑仿鄭俠繪流民圖奏上得捐帑金十萬爲賑命吏治粥以飼餓人全活者甚眾丁亥晉右副都御史巡撫山西提督雁門等關軍務在晉三年緩鞭扑戒沒削植羸困抑豪猾敦節儉下吏肅然其飭邊備則修障殖穀明賞申約復屯政通鹽利清尺籍作士氣除戎器事事覈

實制府上其功賜金綺者三入爲兵部右侍郎以父年及耄
亟歸省後疏陳建文帝久缺祀不報時論譴焉終南京右都
御史稱疾歸

李采菲字君采河間人嘉靖乙丑進士由行人歷陞山西行
太僕寺卿整飭甯武邊備山西布政司參政分守冀南道累
晉右副都御史巡撫山西在晉久於閭閻疾苦長吏賢不肖
邊關隘塞夷情向背如燭照數計故諸措注無弗當機宜協
輿情者未幾罷歸

魏允貞字懋忠南樂人萬歷五年進士二十一年以右僉都
御史巡撫山西允貞素剛果清操絕俗以所部地瘠民貧力
裁幕府歲供及州縣冗費以其銀數萬繕亭障建烽堠置器
市馬易粟又奏免平陽歲額站銀八萬以所省郵傳羨銀補

之雁門平定軍以通屯糧竄徙奏除其租招令復業岢嵐互市省撫賞銀六萬汾州有兩郡王宗人與軍民雜處知州秩卑不能制奏改爲府時以款市弛邊政獨勤視要害築邊牆萬有餘丈政聲大著上亦數嘉其能會詔中官張忠採礦山西抗疏極諫不報已西河王知燧請開解州安邑絳縣礦以儀賓督之指揮王守信請開平定稷山諸礦允貞恐民愈擾請令忠兼領亦不納又請召還王家屏等疏留中以久次晉左副都御史中官孫朝復以權稅至每事裁抑會忠杖死太平典史武三傑朝使者逼殺建雄驛丞李逢春又抗疏暴其罪朝怒劾允貞抗命沮撓時先下朝疏吏部尙書李戴都御史溫純等力稱允貞賢請下允貞疏平議並留中軍民數千人恐允貞去相率詣闕懇寃兩京言官亦連章論救乃兩置

之明年忠以夏縣知縣責應春抗禮劾貶之允貞請留應春不報時疏乞侍養二十上廷議以敕使害民非允貞不能制固留之五月請益力始聽歸士民爲立祠已國視者奏守邊勞卽家晉兵部右侍郎尋卒天啟初追諡介肅

吳仁度字繼叔金谿人悌之子也萬厯十七年進士累遷右僉都御史巡撫山西砥廉隅務慈愛與魏允貞齊名仕至工部左侍郎致仕卒

呂坤字叔簡號新吾河南甯陵人萬厯甲戌進士授襄垣縣知縣襄垣劇尙嚴明期年調大同大同貧尙撫字培植善良裁抑豪橫兩地甚德之先是襄垣土豪某被坤大創去之日送數百里謝曰蒙創誨今而後不復犯法矣知大同時有以人命坐抵以其姻鄰邑大紳向坤言之坤言獄已成不可反

其不受請託如此陞吏部主事轉郎署出爲山東參政陞山西按察使陝西布政旋陞山西巡撫正己率屬自藩臬及承差吏胥皆有明職條約餽遺贖美盡杜絕之尤加意蒙養孤寡無依者復嚴邊防迄後遵成法不廢尋轉兵部左侍郎引疾乞休歸卒贈刑部尙書賜祭葬

吳兌字君澤紹興山陰人嘉靖三十八年進士釋褐十三年隆慶五年遂擢右僉都御史巡撫宣府前此未有也嘗偵俺答離營獵從五騎直趨其營守者愕控茲從騎呵之曰太師來犒軍耳皆拜跪迎導且獻酪兌遍閱廬帳抵暮還而尤善結三娘子加兵部右侍郎萬厯五年夏代方逢時總督宣太山西軍務俺答西掠瓦剌聲言迎佛寄帑於兌留旗箭爲信尙書王崇古奏上方畧使兌諭俺答繞賀蘭山後行勿道甘

肅又陰其謀於瓦剌俺答兵遂挫留青海而青把都部下時入寇大學士張居正令兌趣俺答東還約束之青把都亦罰治其下款貢乃益堅七年秋以左侍郎召還部晉太子少保兵部尙書卒

鄭洛字萬秀安肅人嘉靖三十五年進士隆慶時爲山西參政佐總督王崇古款俺答有功萬厯二年擢右僉都御史巡撫山西移大同加右副都御史入爲兵部右侍郎七年以左侍郎總督宣大山西軍務昆都力子滿五大令銀定入犯洛奏停貢市遣使責俺答罰贖駝馬牛羊乃復許款辛愛襲封三娘子率眾西走辛愛自追之洛遣人婉諭三娘子乃聽命歸辛愛貢市惟謹以功加兵部尙書兼右副都御史十四年擢力克當襲三娘子以年長自練兵萬人築城別居洛復婉

諭摺力克遂妻三娘子嗣封并奏封忠順夫人定市馬數宣
府不得踰三萬大同萬四千山西六千而申飭將吏嚴備以
防盜竊且無輕過其部落馳獵者上嘉納之自太子少保累
加至太子太保召爲戎政尙書十八年洮河用兵詔兼右都
御史經畧陝西延甯甘肅及宣大山西邊務時摺力克遺洛
書以赴青海仰華寺爲名洛使從塞外行又諭忠順夫人曰
彼中復賞不能多且王家在東恐有內顧憂也尋詔洛經畧
七鎮摺力克與忠順夫人諭罪請歸洛進兵青海尙書石星
以宣大事急請速召洛究欵戰之計洛旣至與總督蕭大亨
巡撫王世揚邢玠等上疏曰摺力克諉罪火落赤真相桀驁
之跡已斂且其部落數千里部長十餘輩在巢保疆者宣鎮
則青把都兄弟未嘗東窺而兀慎擺腰五路之在新平馴服

猶故在西行牧不他失未嘗窺莽刺捏工而大成比妓則又歸巢獨先今以一人之罪槩絕諸部消往日之恩開將來之隙臣未見其可今史二外背屢擾邊疆若令順義王縛獻以著信然後酌議市賞在我固未爲失策也議遂定尋加少保召理戎政順義王果縛史二來獻復款如故洛謝病歸卒贈太保諡襄敏

梅國楨字克生麻城人少雄傑自喜善騎射萬厯十一年進士嘗以御史平甯夏哮氏累遷右僉都御史巡撫大同久之遷兵部右侍郎總督宣大山西軍務在鎮三年節省市賞銀十五萬兩有奇卒贈右都御史

鄭汝璧縉雲人隆慶戊辰進士潛心理學讀書得其精要由部曹厯陞兵部右侍郎兼僉都御史都督宣大山西軍務泣

任疾作然講戰守檄行諸道修城堡練士卒治器械不自知其憊也乞罷歸至山東荆門驛卒著有律解謚類鈔帝后紀畧功臣封爵考由庚堂文集

涂宗濬字鏡源江西南昌人萬厯中以進士官御史累按廣西河南順天諸處後巡按山西存厯山西宣大總督晉尙書加太子太保總督如故尋以順義王就封廕世襲錦衣千戶未幾乞休歸久之復起山西宣大總督以老疾辭不得與檄以赴甫數日遽卒宗濬前在鎮時持大體能得將士心聞復任咸踴躍比捐館多嘆息泣下者贈少傅謚忠襄賈應元遵化進士累官右僉都御史萬厯間巡撫大同舉羨餘贖鍰以勞軍市馬各路堡砦凡土築者奏請磚包之與總兵郭琥重修興雲橋備極壯麗官終兵部左侍郎

崔景榮字自強長垣人萬厯十一年進士授平陽府推官萬厯末爲兵部右侍郎宣府大同總督累晉吏部尙書以忤魏忠賢削奪崇禎初復職卒贈少保

趙文炳任邱進士萬厯間巡按摧強抑暴豪惡屏跡官僚望之凜然時有督稅監居省會甚暴橫文炳箝制之不敢肆時有鐵面之稱行日不持一錢捐贖金萬餘散郡邑立養廉倉收息以賑寒士

湯北京字伯閔宜興人萬厯二十年進士爲御史巡按宣府大同請罷稅使中官張亦礦使中官王虎王忠不納入掌河南道卒天啟中贈太僕寺少卿

林祖述鄞縣進士萬厯間巡鹽慈祥篤實恤商裕國當開疆割版之日祖述知大司農已有成心置不與辨事平乃請減

鹽課清歷待撈採以時緝捕有法公論多之

汪以時婺源進士萬厯間巡鹽刻意節儉一以鋤強字弱爲主餘鹽餘銀屢書執奏爲民請命省公用銀糴穀三千八百餘石爲賑饑民鹽丁之用又建太陽廟以補正祀之未及陳于延字孟諤宜興人萬厯二十三年進士爲御史視嵯河東劾權稅太監張忠撓鹽政後厯至都御史卒于延端亮有守與溫體仁不合卒爲所擠

楊師程襄甯人萬厯三十八年以御史巡鹽河東以清名著建雨神廟

蔣春芳益都進士萬厯間巡鹽酌立嵯規可垂久遠新池廟輯志書至今賴之

李國士字汝志毫人由進士厯陞陝西右布政晉山西左布

政使藩祿邊餉積弊一清直指惡其抗直以老聞部方擬調而國士拂衣歸絕口不及世事嘗語諸子曰吾官三十年未嘗枉一事私一錢凡歷任不爲前人玷不爲後人危爾曹其識之

王象坤字子厚山東新城人嘉靖四十四年進士萬厯中厯官山西左布政使有清操都御史溫純請願陟一人以風天下謂莫如象坤云

郭子章號青螺江西泰和人進士萬厯初山西按察使甄別廉貪辨明冤抑尤留意風教禁侈靡汰浮食抑強宗懲橫暴悍卒驕弁皆祇畏斂迹一路肅清時手著聖門人物志十二卷刊頒諸生以示觀摩尋陞去後巡撫兩廣以邊功晉兵部尙書

孫維城號衛宇山東邱縣人隆慶辛未進士壬辰以治行第一陞山西按察副使晉參政又晉按察使寇小酋安兔恃驍健挾市龍門請以五千鐵騎待命關下維城知其虛實禁止之乃獻出邊屬夷自贖毋敢挾市幕府上其功晉右布政使移守宣府與中丞同心共事謀畫相參夷人關市乞賞一切裁以故事一餅一糲不得浮予歲積撫賞獎金十四萬及軍市租五千皆充年例將吏悅服遷布政庚子靖延綏進僉都御史開府榆林以疾卒於軍

周仕字汝信三原人萬厯間進士爲鍾祥知縣力抗強璫績著循良厯陞兵部郎中晉秩參政治兵雁門擢山西按察使河南布政使所至有聲飲冰茹藥一介必嚴歸之日環堵蕭然

李維楨字本甯湖廣京山進士由庶吉士授給事中歷提學副使所至有聲萬厯間陞山西按察使明斷如神不事苛刻每以弼教明刑爲心敦請耆儒纂修山西通志親加考核當時稱爲信書終南京禮部尙書文章詞賦與中原七才子先後齊名著大祕山人集行世

王豫立字定父涇陽人萬厯間進士歷稷山嵩縣知縣政績卓然擢南京刑部主事改北禮部爲儀制司諸藩襲封事代藩寵妃欲以支子易嫡謀已就獨豫立不從兩疏請之始得正名後襲爵之儲以魚鮓藏金三千金報謝豫立啟鮓見金卽叱來人驅之門外竟不報函尋備兵霸州轉山西平陽道擢按察使正已率屬墨吏猾胥皆爲斂跡陞河南左布政使乞休歸

王世能宣城人萬厯間爲運使有惠政恐商困於催科不差役滋擾親督採鹽商人獲利後卒於官商民思之

林國相閩縣人進士萬厯間鹽運使蘇商惠民尤加意於作人創義倉置學田以周貧士刻厚生纂訓問字錄二書行世趙健劔州恩生萬厯間鹽運使姿性聰穎不爲左右所欺廉介自持一毫不苟數十年餘猶有道其清者

劉奮庸洛陽人嘉靖三十八年進士穆宗初以裕邸舊恩爲尙寶卿久不徙神宗卽位擢山西提學僉事秉義甚高量復宏遠視諸生如子弟晉寺人如辟疆闢者數處雖掃徑延之不往也其耿介又如此

薛亨字道行韓城人隆慶間進士授戶部主事改兵部武選司擢山西提學僉事教先德行而後文藝以齋膳之美置學

周士不給者遷副楚憲過家以其祿爲宗人輸租置義田
義學義冢由四川參政遷山西按察使治汾州強宗斂手受
要束乃增陴浚隍請陞州爲府彈壓之平獄數十百人遷河
南轄汰筦庫宿弊爲忌者所議坐罷歸署所居堂曰敬忍於
世事一無所問

周繼昌江南無錫人萬厯間以進士督學山西風儀超朗植
性剛明閱文高下悉當遇諸生訓誨朋濟有如子弟至有弗
檢立繩之法晉藩欲以威命凌一生力持獲免郡邑長吏善
教養士者甄異之摧抑者訶斥之言不近名行不偶俗僚屬
擬其人有雲霄品格金玉文章之語始督學楚凡三校士始
終謝請囑嘗論諸生以方今公道惟有文衡一事因指天曰
明心轉楚參議不赴歸

王三才蕭山進士萬厯間督學副使文名擅海內居心廉介以空缺銀兩置儒學常平倉以濟寒士又創建太原平陽考場歲省千金陞本省參政

呂三才山東臨朐進士萬厯間山西督學道閱文知人心術及富貴貧賤功名遲速厯厯不爽戊午科榜中式皆試文評語有中字者士子稱爲神明陞本省參政

張夢鯉萊陽人萬厯間糧儲道督通省田糧派有額徵如期革櫃頭爲官收之例晉民稱便後任右轄董理鑄錢其利大行纂修賦役冊書悉出手裁永爲經制後任左轄各屬進解京邊銀不入司祇以文檄相轉給宗祿均鹽鈔省在價不餉一毫餘羨咸稱頌之

沈人种嘉定進士萬厯間分巡冀寧道修理城池均平地糧

定襄士民甚德之

麻溶宣城人進士萬厯間以戶部郎中分守冀南道性甘淡薄善於判訟改府創學調停得宜大有功於汾陞河南右布政

賀邦泰丹陽進士萬厯間分巡冀南道寬厚中有執持以文學調本省提學厯官廉使

霍維蓋曲周進士萬厯間分巡冀南道旌節孝戢強橫以正人心移風俗爲急務人咸以古君子稱之

侯世卿武強進士萬厯間分巡冀南道實心爲民值大歉開廠煮粥借無礙官銀乞糴於河東以平價全活甚多累官布政使

宋應昌號桐岡會稽人嘉靖乙丑進士初知絳州厯陞山西

副使精心救荒禱雨用春秋繁露法有奇應龍見於甕及猗氏壇井中鱗角皆具蒲州水啗城城圯操文祭之水驟落三尺其他編審義倉鄉約保甲上下安之後陞河南左參政終工部右侍郎改右都御史經略乞歸

龍膺字綸隱湖廣武陵進士博學有才幹長於詩詞萬厯間分守河東道絕饋遺禁賄醵除暴安良每所履州縣進父老諸生誨以孝弟力田之義夜輒潛至城頭察有讀書聲及紡績聲次日卽給以燈油之費聞有酗酒肆惡者大爲懲創凶暴屏跡良善鼓舞轉甯武道修理邊牆興起學校百廢俱舉改甘肅道陞太常寺卿

梅友松內江人進士萬厯間分守河東道練達吏治洞徹人情除奸貪疏冤滯機略雄沈兵民咸服累官總督宣大軍務

趙曜掖縣進士萬厯間分守河東道清嚴狷介人不敢干以私累官遼東僉都御史

詹思虞常山進士萬厯間分守河東道新學校以造士改教場以練兵強幹有爲遠近瞻望其風采

喬學詩東阿人進士萬厯間分守河東道興廉懲貪愛民作士每以篤誠誦正率下人亦不敢欺陞廣東布政

陳儒新建進士萬厯間分守河東道持已清嚴風紀振揚豪強斂跡境內肅然陞雲南參政

南逢吉號姜泉渭南人以易舉進士高第授儀制司主事骨氣丰稜峻潔而果斷由雲南督學副使陞兵備雁門諭三關將士循習令甲講明陣法以備寇數巡關外軍聲大振上備邊便宜五事語觸忌諱罷歸著有姜泉集越中紀傳若干卷

藏於家註解會稽三賦刻在會稽郡中

南居益字思受渭南人少厲操行舉萬厯二十九年進士累官山西提學副使雁門參政繕治亭障省費萬計厯按察使左右布政使竝在山西天啟二年入爲太僕卿崇禎時爲工部尙書削籍歸十六年賊陷渭南加炮烙不屈死

張維誠永清人萬厯中以進士任雁門兵備副使修舉廢墜多所營置墾塞下田萬餘畝歲收穀萬石建補助賑儲之以貸軍民之不足者春借秋還不責其息而別爲之田以贍寒畯邊地素不解織乃招榆次婦教之立局西郭時課其勤惰又以其贏設粥廳施棺所布縷庫醫藥局凡民之貧病死亡而無歸者悉取給焉惠政大行後陞參政

李從心南樂進士萬厯間岢嵐兵備道嚴禁州縣饋遺重懲

刁惡待軍民以恩收羅才勇以備時用人人奮敵愾之思吏治民情無一不悉

趙彥膚施人萬厯間以進士任岢嵐兵備道有應劇才尤精兵略嘗徧厯所部相度衝緩勾稽芻糧具能得其要領因爲添防守易將衛廣城堡選智勇節省浮費逾十餘萬又修保德城高墉崇雉民勒政績於石立祠祀之

陳昌祚福建長樂人前督學道瑞子萬厯間以進士任偏關兵備道輯安兵民尤嘉惠學校嘗過三功祠下眷懷先澤移建南城外順城街中復紀其顛末勒之貞珉祀名宦

以上萬厯中

袁化中字民諧武定人萬厯三十五年進士泰昌元年爲御史劾首輔方從哲天啟元年出按宣大有聲以憂歸四年起掌河南道力劾魏忠賢崔呈秀同道考覈又據實列上乃以

推山西巡撫謝應祥事調之外已竄入汪文言詞下詔獄斃之崇禎初贈太僕卿

劉大受泰和人天啟二年以御史巡鹽河東酌量預報裁省添搭刪灘地蘆價清護池侵地取回苦池租銀作餉募兵又有修學整城諸政

李日宣吉水人天啟三年以御史巡鹽河東修八政橋建宏運書院於學宮旁

姜思睿字顯愚慈谿人天啟二年進士劬學勵行以御史視河東鹽政值歲歉出金煮粥以哺餓者置漏澤園瘞道殣安邑有故都御史曹于汴講學書院擴其堂廡祀卜子夏王通薛瑄其中以于汴配置田構舍公餘親蒞講授

張潑樂陵人進士天啟間巡鹽時有窮商五十餘家立豁其

課杜超掣緩預報一切繁費悉行裁省懲積牙之蠹葬無主之殍報竣後尙留金糴穀幾四千石以備災荒最遺患者朝議加課潑特疏痛陳商苦獲免去之曰商民遮道泣送蔡復一字敬夫同安人博學善屬文萬厯二十三年進士光宗時爲山西右布政使清介自持天啟中總督貴州雲南湖廣軍務卒橐無遺貲謚清憲

文翔鳳字天瑞陝西三水人萬厯庚戌進士天啟間以副使提學山西力振晉人菱蒨之習以劾魏瑞回籍卒翔鳳以辭賦爲專門純學覃思腐蘊必欲追配古人詩離奇稟兀可與劉父馬異鬪險今三晉士振奇者猶多祖其習云

曹暹岐山人天啟間進士任猗氏知縣民感其德巡按江淮振厲風采允稱鐵面參議冀甯平晉藩之亂釋久沈之寃及

告歸寇攻岐城出夙養丁壯守禦賊喙駭而去岐城賴以安
全

來復字伯陽陝西三原進士天啟初分巡河東道文武長才
經濟偉略時將多事預爲城守計所厯州縣必驗臨城池督
責修理後十餘年流賊入晉平陽諸城不爲賊陷者皆復力
也穎悟過人文詞琴奕書繪皆臻其妙卽醫卜星占靡所不
精至不拜魏祠人尤稱之

以上天
啟年

白希繡延安人萬厯進士由魚臺知縣擢吏科給事中丰裁
稜峻廉隅自矢久之出爲參政陞山西巡撫都御史墨吏望
風解組

吳姓字鹿友揚州興化人萬厯四十一年進士崇禎七年九
月召對稱旨由大理寺丞超擢右僉都御史巡撫山西姓厯

陳防禦邊寇練兵卹民四難及議兵議將議餉議用人四事
每歲暮扼河防秦豫賊連三歲無一賊潛渡以間修築邊牆
八年四月上疏言晉民有三苦一苦凶荒無計餬口一苦追
呼無力輸租一苦殺掠無策保全由此悉爲盜請蠲最殘破
地十州縣租上卽勅議行戶部請稅間架力爭不聽秋以朔
忻代之役鑄五級宣大總督楊嗣昌大同巡撫葉廷桂鑄三
級俱戴罪視事部議開山西礦極陳五害寢之山西大盜賀
宗漢劉浩然高加討皆前巡撫戴君恩所撫擁眾自恣牲陽
爲撫慰而密令參將虎大威劉光祚等圖之以次皆被殲牲
行軍豎二白旂脅從及老幼婦女跪其下卽免死全活甚眾
在晉四年軍民戴若慈母謝病歸後仕至東閣大學士
宋統殷山東卽墨人崇禎間以進士任山西巡撫時流寇蜂

起統殷親督師擊於長子勝之賊走沁水犯寶莊爲里人張道濬所扼賊窘甚又聞秦師且至因號呼壁下求撫張令還所掠散遣徒黨當爲言撫軍貸爾死賊如命拔營而西咸就約束惟八大王闖塌天五營不受統殷偵知之引師襲其營賊渡河而南次年復來統殷與王兵備肇生遏之陵川賊至殊死鬪互有勝負會夜與賊爭險對營兩山頭賊由間道潛出其上大譟師遽潰統殷與王俱走適張總督宗衡駐高平統殷以師畢會大破賊於桑子鎮賊復走沁水未幾解任去以許鼎臣代之

許鼎臣江南武進人崇禎六年以進士任山西巡撫鼓勵將士誓掃寇氛適沁水張道濬設伏三纏窰中生擒賊首滿天星等鼎臣爲獻俘闕下並奏功第一爲當時勦已而部議鼎

臣駐汾州統奇嵐甯武諸軍凡汾太遼沁三十八州縣有盜
倣卽以責之

陳純德字靜生零陵人舉崇禎十三年進士年已六十矣莊
烈帝召進士召時事立擢御史十四年巡撫山西感上知盡
心職業七月部內嚴霜八月大雪民多凍餒疏請恤因極陳
抽練之弊後督畿輔學政十七年三月二十一日殉職

蔡懋德字維立崑山人幼志聖學篤好王守仁書舉萬厯四
十七年進士崇禎十四年十二月爲右僉都御史巡撫山西
召對稱旨賜酒饌銀幣十五年春蒞任大盜王冕等爲亂討
平之總兵許定國援河南潰而歸懋德定其亂十月統兵入
衛畿輔詔扼守龍泉固關二關而賊已陷河南將犯平陽境
急馳河上禦之數月至十六年冬賊入潼關陝西盡陷自蒲

州北抵保德二千餘里悉與賊鄰恃黃河爲限窮冬冰合賊騎得長驅懋德連章告急請禁旅及保定宣府大同兵馳赴河干合拒中朝亦以山西爲憂廷臣請防河者甚衆然無兵可援總兵周遇吉鎮甯武僅得自顧宣大總督王繼謨奉命防河亦不至懋德以疲卒三千當數十萬強寇日奔走平陽汾州間猶屢挫之大慶風陵吉鄉諸渡十二月岢嵐保德俱告警太原洵晉王手書趣懋德還懋德不得已分兵守二郡以十八日去平陽越三日賊卽渡河副使李士焜知府張嶙然等棄城先遁俄復還越二日李自成至嶙然迎降平陽遂陷十七年正月巡按御史汪宗友劾懋德不待冰泮遽還太原致名城淪覆詔奪官候勘以郭景昌代之懋德先遣兵拒賊而屬城盡陷反拒官軍乃與布政司使趙建極諸監司

毛文炳蘭剛中畢拱辰太原知府孫康周署陽曲縣事長史
范志泰等大集城中人誓以死守懋德哭眾皆哭聲震原野
罷官命適至或請出城候代懋德不可曰吾已辦一死矣景
昌卽至吾亦與俱死是月晦游騎抵近郊自成知懋德賢遣
使招諭曰撫軍若降吾且大用懋德憤立火其檄斬使人頭
懸城上二月五日賊悉眾薄城遣部將牛勇朱孔訓王永魁
出戰俱敗歿六日自成具僞鹵簿督眾力攻城上發礮擊之
賊多死七日晝晦大風拔木飄瓦終夜不息守者皆仆懋德
知不能支預草遺表時調陽和兵三千協守剛中慮其內應
移之南關外果叛降賊而部將張雄者守新南門與賊通懋
德召中軍副總兵應時盛謀將調雄守大南門未幾雄縋城
出降語其黨曰城東南角樓貯火器火藥我下卽焚樓樓焚

守者悉走賊乘勢登城懋德北向再拜出遺表授贊畫知縣賈士昌命其間道奏聞拔刀自刎爲麾下所奪時盛請下城巷戰遂扶上馬時盛持矛突殺數十人至炭市口賊騎充斥時盛呼曰且擁公出西門懋德遽下馬曰我當死封疆汝輩可自去眾復擁懋德上馬至水西門懋德叱曰汝輩欲陷我不忠耶復下馬據地坐時盛已出城還顧不見復斫門入曰請與公俱死遂偕至三立祠懋德就縊未絕時盛釋甲加諸肩乃絕時盛再拜訖卽去弓弦自勒死

焦源溥字涵一三原人萬曆四十一年進士崇禎二年爲分巡河東道副使預平大盜王嘉允遷甯武參政再以平寇功就還山西按察使七年擢右僉都御史巡撫大同時兵缺餉乏歲浡饑民無稂秔亟請蠲賑且增兵餉當事不能應踰年

遂自劾求去監視中官魏國徵撫論其不職坐罷歸十六年
爲流賊拔舌支解死

張宗衡臨清人萬厯四十一年進士天啟七年五月爲右僉
都御史代張翼明巡撫大同引宿將滿桂爲助大修邊防時
虎墩兔議順義故時額賞起王象乾督宣大令任款事象乾
定撫議宗衡初與同議後力言宜戰不宜款檄總兵王牧民
副使宋統殷閉不許通市乃上疏曰自插部駐歸化城去大
同僅三百里閱時三月未敢近大同一步我固無如插何插
亦無如我何則以饑寒窮困插與我不異爾插賴撫賞爲命
兩載不領資用已竭加以巢穴未定半懷攜貳東西馳驅勞
頓已甚其駐牧處草根皆盡馬瘦如柴暴骨成莽屢索我迎
風諸禮望款不啻望歲而我墮其計中厚遺以金繒牛羊米

粟諸物是插本窮而我固富之插本弱而我固強之我有利
不得自利又轉以爲插利豈不痛哉使彼有纖毫懷德之意
猶之可也乃往來講議其咆哮之狀悖慢之辭至不忍聞彼
窮餒猶如此草青馬肥憑陵狂逞可勝道哉臣謂惟此時可
以圖插幸聖明速決上報曰宗衡旣知款不足恃當實圖戰
守無取空言象乾疏請專任撫臣上乃責宗衡先後異議兵
科給事中陶崇道復力駁之宗衡再疏曰插賞新者八萬一
千加以馬價大同兩年二十四萬山西兩年十萬宣府十八
萬遼東兩年四十萬共百萬矣當此三空四盡之秋忽舉百
萬以款敵臣實不解謂不款能患我耶臣抵大同九月矣未
嘗談一款字彼亦未敢近邊謂借款方可修備耶臣方造火
礮演車陣整器械葺邊垣何嘗一日不修備彼亦何能禁我

之不修以插之疲甚饑甚困窮甚忽睹此百萬金錢一去而不返也臣安得不痛憤乎撫敵何如撫土資寇何如滅寇臣揣時度勢計當如此而時局不容請賜罷斥象乾亦再疏陳利害兵部尙書王洽言宣府二十三萬大同十二萬山西五萬合之四十餘萬乃俘馬價所謂互市也又奏宗衡議戰欲得京營馬萬五千火器三萬計一馬費二十金當三十萬一火器費三十金當九十萬此百二十萬安能驟應宗衡但知插部饑疲不知自吞并諸部人馬眾盛卽戰亦豈能必勝後竟如象乾議宗衡抗疏力辨詆象乾專任王牧民之非且求罷斥不允四年春魏雲中罷擢宗衡兵部右侍郎代之五年五月得勝堡幾失與巡撫張廷拱並鑄級視事監視中官劉允中極陳殘破狀參議王則右疏白其誣乃不問時殺寇入

山西部議宗衡移駐平陽統虎大威李卑賀人龍左良玉諸將兵以平陽澤潞四十一州縣屬之巡撫許鼎臣駐汾州統張應昌苟伏威頗希牧艾萬年諸將兵以汾太沁遼三十七州縣屬之宗衡聞命卽提陽和兵從澤州尾賊至陵川勝之再敗賊潞安之西火斬級二千連戰陽城之陽泉沁水之毛連溝鹿臺寺石塔杏谷並破之俘斬皆千人已卑人龍萬年以關中兵至鼎臣檄從已宗衡怒檄三將還賊遂轉入磨盤山乘間從武鄉陷遼州宗衡強起舊帥尤世祿使率人龍卑赴援六年正月復其城會秦將曹文詔至與猛如虎屢破賊賊漸衰時張應昌任山西總兵五檄之不至怒而言於朝俄以賊窺河北乞勅山西撫鎮率卑萬年馳勦毋以臣爲孤注語多侵鼎臣鼎臣亦劾宗衡所舉監軍主事李葵會賊果入

河北宗衡乃還陽和時虎墩兔遠竄部下無所歸多叩關乞降宗衡受之安輯者萬二千餘人大同自是無插部患七年五月崞縣靈邱諸城堡多破命戴罪視事旋命盡督諸鎮援軍而援將吳襄尤世威等皆不至九月論罪謫戍十五年臨清破死於兵予卹典

邱民仰字長白渭南人萬厯中舉於鄉崇禎中爲御史山西巡撫宋統殷專主撫下令殺一流賊者償二命賊愈張民仰疏論其罪後爲大同副使十五年以右僉都御史巡撫殉節虛象昇字建斗宜興人少讀張巡岳飛傳輒歎息曰吾得爲斯人足矣舉天啟二年進士崇禎八年八月總理江北河南山東湖廣四川軍務尋晉兵部侍郎加督山西陝西軍務賜尙方劍便宜行事殲流寇幾盡九年九月宣大總兵梁廷棟

卒遷兵部左侍郎總督宣大山西軍務宣大素苦缺餉乃大興屯利行二年積穀至二十萬上諭九邊奉以爲式十一年三月以生辰方舉觴侑客謀報西部乞炭台吉數萬騎入邊求市卽夜督兵出羊房口尅期決戰乞炭解去越二月外艱廷議奪情留任四疏懇請上哀之特起陳新甲制中令象昇候代新甲家四川未上乃墨纓從事尋晉兵部尙書九月督山西總兵楊國柱王樸虎大威諸軍入援十二月朔殉節贈太子少師兵部尙書

衛景瑗字仲玉韓城人天啟五年進士崇禎十五年二月爲右僉都御史巡撫大同歲饑且疫疏乞賑濟給牛種民獲甦乃戢豪宗蒐軍實練火器聲績甚著十七年正月李自成將犯山西宣大總督王繼謨檄大同總兵姜瓖扼之河上瓖潛

遣部將李時華納款而還景瑗不知也及山西陷邀瑗歃血誓死守瑗布訛言衛巡撫秦人將應賊代王既疑之不與相見永慶王至射殺其僕會景瑗有足疾不時出兵事皆瑗主之瑗兄瑄以昌平總兵失律繫獄後赦出就瑗力勸降賊瑗虞卒不從人犒銀數兩不足則予布帛佯言勵將士固守王及士民咸信之諸郡王分守城門瑗每門遣卒二百助守至三月朔賊抵城下瑗卽射殺永慶王開西門迎賊使人詐要景瑗議事景瑗乘馬出知有變自墜馬下俄爲賊所執見自成自成欲官之景瑗不屈據地坐大呼莊烈帝而哭賊義之曰忠臣也不殺景瑗猝起以頭觸階石血淋漓賊引出顧見瑗罵曰反賊與我盟而卽叛神其赦汝耶賊使景瑗母勸景瑗降景瑗曰母今年八十餘當自爲計兒國大臣不可不死

母出景瑗謂人曰吾不罵賊者以全母也六日自經於僧寺
賊歎爲忠臣移妻子空舍戒無犯

祝徵江西臨川進士崇禎初山西巡按懲貪興廉法紀振肅
禁饋遺卻贖羨以鍰銀令各州縣存百兩爲養廉資本性好
題詠所履州縣公署多親書聯額

胡良機字省之南昌人萬歷四十四年進士天啟初爲御史
言魏忠賢欲門生宰相斥去崇禎初起故官按宣大年滿當
代褒以敝練令復巡一年尋爲宣府監視中官王坤劾罷終
南京吏部主事

陳廷謨成安進士崇禎間巡鹽甬衙命入境卽禁班迎鋪設
之擾在任禁劣採親課程清衙蠹調課額俱有成效丁艱歸
民立去思碑

王與允新城進士崇禎間巡鹽寬嚴互用奸宄屏跡革勒民
撈採以塞弊竇恤壓待商人以蘇子遺會流賊近城與允素
得民心且執法不貸協力堵防運城無恙

楊繩武彌勒進士崇禎間巡鹽政持大體凡事游刃而解不
假手於左右劾貪吏招逃商又特疏民間疾苦乞免旬差之
累賑饑民養貧士捐俸贖以葺文廟池神廟表忠祠極重武
備修城練兵殆無虛日聞秦寇逼河躬率士卒沿河堵防民
賴以安去之日行李蕭然商民無不嘆泣

楊鵬武陵人進士崇禎間巡鹽時連值歲歉糴米於太汾秦
渭徧給窮民又築敵臺增新兵河南土寇崔惟一聞風潰散
又置田贍士以資四民之無告者

徐有聲字聞復金壇人登鄉薦以戶部郎中督餉大同十七

年李自成陷城不屈死

焦源清字湛一三原人源溥之從兄也萬厯中進士厯山西右布政使擢巡撫宣府後爲賊執不食死

鄭國昌邠州人萬厯三十五年進士厯官山西參政崇禎元年以按察使治兵永平遷山西右布政使上官奏留之三年正月殉城一門盡死贈太常卿賜祭葬蔭一子

趙建極河南永甯人萬厯四十七年進士賊掠永甯五子皆死累遷山西布政使流賊入城危坐公堂賊擁至晉王府欲授以官叱曰我天朝方伯乃仕賊耶李自成令曳出斬之下階連呼萬歲曰臣失守封疆死有餘罪自成以爲呼已也曳還問曰旣呼萬歲何不受官建極厲聲曰我呼當朝主上甯呼賊耶大罵自成立殺之趙氏一門竟絕

鄭嘉生直隸武進人萬厯間進士重氣節有操守不肯附人
崇禎初山西按察使釋繫囚辨冤抑不事苛察光明正大
不敢欺至革淫祠禁侈汰風紀振肅吏畏民服

李徵宗任邱人萬厯三十八年進士厯官山西按察使罷歸
崇禎九年以殉難贈卹

都任字宏若祥符人萬厯四十一年進士崇禎中爲山西按
察使性剛毅多忤物月朔諸僚約同朝晉王任曰會典朔望
朝王惟都布二司不及按察按察得糾舉非法奈何與守土
者同朝執不行巡按御史張孫振誣劾提學僉事袁繼咸任
數慰問繼咸盡其行孫振中以大計貶職歸後飭榆林兵備
十六年殉城

袁繼咸字季通宜春人天啟五年進士崇禎七年春爲山西

提學僉事子身赴任較閱公明聲望大著巡撫吳姓薦其廉能請加優擢而巡按御史張孫振以請屬不行銜之特疏誣繼咸賊私事上怒逮繼咸責姓回奏姓極稱繼咸賢斥孫振誣詆諸生聞繼咸逮羣隨至都伏闕訴冤繼咸亦列上孫振請屬狀及其賊賄數事都察院言孫振倒置是非大負巡方職有詔逮訊繼咸得復官孫振坐謫戍天下快之繼咸後爲兵部右侍郎兼右僉都御史總督江西湖廣應天安慶軍務駐九江殉職

田時震富平人天啟二年進士崇禎中忤吏部尙書王永光爲山西左參議就遷至右參政罷歸十六年冬流賊陷富平不屈死

蘭剛中字坦生陵縣人崇禎四年進士由南京給事中遷山

西副使甫泣任流賊入城被執說之降大罵曰豈有蘭坦生屈膝求活者乎賊殺之首旣墮復躍起丈餘賊皆辟易

黃世清字澄海滕縣人崇禎七年進士累官山西冀甯道僉事遷商維道十六年十月殉城贈光祿卿

畢拱辰字星伯掖縣人舉進士山淮徐兵備僉事移冀甯被賊執賊適得新刀拱辰睨之問何睨曰欲得此斫頭耳賊遂取斬之

毛文炳字夢石鄭州人由進士厯知壽陽淪次縣遷吏科給事中出爲山西兵備副使爲流賊所執誘以官不從抗罵數日被殺妻趙妾李亦投井死子兆夢甫數歲被掠去士民以忠臣子贖而歸之

王肇生山東掖縣人崇禎間以舉人累官分巡冀南道英爽

有膽略練習兵事陵川賊馬小懷作亂親督將士入險阻搗其巢賊驚潰因議設參將以資彈壓王申流寇將自河南入請兵撫軍扼其衝復與監軍焦浴總兵曹文詔和輯兵民俾無騷擾三人雅相善生平虛懷延攬念軍興之際當爲國家收羅奇材異能凡劍客力士有片長者輒結納恐後以勞卒官士民立祠祀之後贈光祿寺卿

吳阿衡裕州進士崇禎間分守河東道偉質長才威望素著盜賊遠遁地方安靖累遷薊遼總督殉難

汪喬年字歲星遂安進士崇禎間分巡河東道布袍疏食自處儉約視民疾苦不啻身受精明練達人不敢欺常行部有安設豐厚者曰值此民窮財盡之時做官當爲國惜財爲民惜命無論其他只此一盆火可當中人數日餐盡令撤去一

時貪墨者皆爲斂輯未幾陞陝西提學累官總督征李自成死於陣

朱之馮字樂三大興人天啟五年進士崇禎中爲河東副使所部鄴秦豫寇警日至大猾朱全字潛通秦賊令廢將謝鳴進執殺之部內以甯晉宣府巡撫殉節

洪允衡商城人萬厯中進士厯官陽和兵備副使崇禎十四年二月流賊陷商城力戰死

朱家仕河州人崇禎末爲陽和分巡副使流賊至盡驅妻妾子女入井而已從之一家死者十六人

周鴻圖山東卽墨人崇禎間由明經以軍功厯陞參政強毅有大略流賊久據河曲不下鴻圖統川貴兵進勦同事首鼠不前鴻圖曰兵貴拙速未聞巧遲乃直抵城下據賊水道與

戰大敗之八日城遂下卽任奇嵐道以縣城被賊瘡痕屢發賑粟有收難婦者悉令還之一卒抗令卽斬以徇邊境得安王允懋字有懷霸州人第進士崇禎時知太原府遷甯武兵備副使李自成既陷太原遣使說降斬之與總兵周遇吉固守城陷自刎死妻楊投井殉

閻夢夔鹿邑人進士崇禎末以參政爲代州兵備城破抗節死以上崇禎年

右明隆慶至崇禎一百一十二人

國朝

馬柱國遼東人順治元年巡撫山西時流寇據太原城八月死亡以數十萬計遺黎略無生意柱國統兵至一鼓破之搜餘孽殆盡始入城輒督兵登陴俾無得入民室安集撫循民

稍復業時客兵亟往返供億滋眾柱國先具牛酒迎郊外慰諭再四俾無譁無掠以驚殘氓雖征調頻仍而里閭若不知有兵垂二年遷陽和總制以去

申朝紀遼東人順治二年巡撫山西下車糾劾墨吏十餘人羣僚肅然站銀舊額一十五萬明季裁充餉驛費不足派之里甲至二十萬有奇朝紀廉得其狀疏請仍歸正項驛馬官牧養無得派民勒石郡邑至於剿平土寇清獄囚裁吏典禁胥役私禁人犯革募夫發報里民胥有實惠卒於官晉人立祠祀之

祝世昌遼東人順治六年巡撫山西時姜逆作亂晉省震動世昌性激烈凡從賊者棄城者率竿諸城力請速進兵殄滅需餉數十萬殫慮經畫軍有餘糧民亦不病科擾事平特疏

請豁賦七百萬石徭十萬餘丁民獲少蘇無何病卒卒之日
百姓巷哭忠烈祠成後撫以死忠死事一也首祀焉十三年
賜謚景僖蔭一子入監

劉宏遇遼東人順治七年巡撫山西時姜逆初平邨聚多蹂
躪而逋賦如山積宏遇疏請豁民寢蘇又恤諸死事家建忠
烈祠祀之辛卯鄉試直指以艱愆期捐俸分給竣試士俾無
寒餒壬辰饑遣使散賑復賁粥城中全活者眾修文廟鑄祭
器立義冢設養濟院補城東南樓治宜春拱極迎澤門橋築
堤以障汾流俾無壅城實政次第舉而絕餽遺清衙蠶革市
行尤爲拳拳既去民懷其德建祠以報

佟養量遼東人順治六年任宣大總督駐陽和時姜逆初平
骸骨徧野爲斂而葬之又建報忠祠祀一時死事者嘗錄重

因有張發者業斃於獄矣其族多論死檢原案覆視特爲豁
免內丁楊洲玉寓齊生所獲藏鏹八百兩呼其子弟至悉畀
之修學習禮教射其中會部議衛所屯田照內地民田例起
科抗疏言邊地種遲霜早沙磧相望加以凶盜頻仍荒殘愈
甚若復援例起科勢必聞風俱潰夫有人斯有財益下卽益
上此司計者所當知也疏上獲允大同人至今感之

黃徵允福建晉江人順治元年以進士巡按山西時三晉初
定民多竄居山谷徵允單騎入險阻慰諭俾復業先是閩逆
據晉賦役業入強半至是特疏以聞凡僞官嘗徵者胥爲豁
免而晉民之死義者胥以其狀上又嘗綜三晉情勢疏陳四
事一曰薦遺佚以求錄用一曰立師儒以育賢才一曰禁訐
告以安窮黎一曰復站銀以蘇驛困疏入次第舉行當時稱

爲許謨焉

劉嗣美河南陳留人順治九年以進士按山西性剛毅彈劾雖權貴不避巡部時微行訪民疾苦奸胥墨吏憚之弁卒曩占民室民惴惴不敢出一語嚴爲科條令胥出賃直草豆輸會城市魑緣典守以肆勒索廉得其狀立斃之飭州縣徵賦行易知單民便之其他懲蠹役裁徭夫甦驛困革行戶民胥咸頌焉

李之芳字鄴園山東武定州人順治十六年以進士巡按山西貪墨吏多斂迹而措注鉅細務雅有條理古所謂清望公望者惟之芳克兼之尋以缺裁回道後爲浙閩總督平耿逆之亂累官大學士卒謚文襄

孫茂蘭遼陽左衛人順治四年以生員任山西布政使時朝

議以太原重地特令滿兵駐防所圈民地胥以廢藩土田給之而屯丁多抗不予租民莫敢誰何茂蘭痛繩以法始獲安本業滿兵間與民爭所司率分左右袒茂蘭用情理訊之俾各厭其意以去兵民咸安涖任六年擢甯夏巡撫去之日攀轅泣送者不絕

王庭字言遠浙江嘉興人已丑進士順治十六年任山西右布政性孤潔以冰蘖之操倡屬吏有晉謁者輒助令牧養百姓慎出納吏不得上下其手藩司甚煩劇庭處以清靜內外肅然放衙後輒顧四歲孫握筆作大字灑然樂之尋以裁缺去庭工制義與熊伯龍劉子壯齊名晉人士多能誦其文者而閭巷亦歌思不輟焉

劉澤溥廣甯人順治間任分巡冀南道持重不擾得憲臣體

姜逆之亂其黨沈通應蜂擁太行山中澤潯死之

贈光祿寺卿祀忠烈祠

斑璉字華宇遼東廣甯人順治十二年以貢生分守河東道有才略夙著威望涖任初賊張五聚黨數千人盤踞夏縣山中時時鈔略爲民害璉遣人伺動靜具得要領因令偏裨於賊出沒地伏兵堵截而自統官軍銜枚疾走徑搗其巢賊嘗恃險阻且疑郡縣官之懦也不爲備驟聞官軍至遽遽出戰不能支奔逸四散又悉爲堵截者擒斬無遺自是民獲安枕後遷陝西莊浪副使道以去

許可用遼東蓋州人順治四年以弟子員任雁平道慷慨饒謀略姜瓖變代人劉遷應之眾數萬屯城下攻甚力可用督兵民捍禦而密遣人赴軍前請合勦遷遂授首圍獲解在任

三年擢陝西關西道代人立祠聶營村

徐淳遼東人順治間任岢嵐兵備僉事道姜逆之亂偏關遙應之淳爲賊所執脅降不屈死

贈光祿寺少卿蔭子入監祀忠烈祠

金光祥遼東人順治五年任甯武兵備僉事道性嚴厲姜逆之亂甯武兵從之光祥自縊死

贈光祿寺少卿蔭子入監祀忠烈祠

徐一范江南蕪湖人以進士任禮部郎中轉左衛兵備道時業知姜瓖變私念猶子明弼知馬邑縣可藉以殺賊驅車直前不少阻比至城下傷於槌蓋賊黨環市一范固無由察也至死罵不絕口

宋子玉遼東人順治間任大同兵備道駐朔州姜逆之亂密

與通判楊知州王謀靖內患既而變猝起謀不克遂因手刃愛子以死

薛陳偉祥符舉人順治十三年分巡河東道有治盜功先陳偉來任者爲廣甯班槌亦以剿平巨賊有績陳偉後調爲薊州副使

以上順治時

郝惟謙直隸霸州人康熙二十八年以御史巡視河東鹽政時護池渠堰亟修亟圯民力敝於濬築又前准淮浙例課鹽並加商以引浮於丁鹽多壅滯下顧如鹽請諭課如令甲前院李時謙嘗採運使張議入告未盡除也惟謙復屢疏陳乞曰包課之情可矜包課之勢難繼若此日浮徵不豁將他日正額必虧必獲請乃已復立按丁分工之法縣夫幾挑築渠堰幾井袤廣高深胥釐畫分工訖各登其名於籍後有塌毀

輒按名令修築人胥以爲便因疏諸朝俾永爲遵守
穆臣滿洲人康熙十五年任山西按察使持法能平遇訟者
輒以善言解之給銀米於獄必親詣按名以給在任四年
巴哈布滿洲人康熙三十七年任山西按察使精敏習律例
性仁恕持法能平而義所不可雖抗論大吏前不少撓尤加
意作人立義學數十捐俸增修貢院號舍

聖祖仁皇帝賜清慎勤三字匾尋回旗三晉人至今懷之

張鵬翮字運青四川遂甯人康熙二十四年以進士累官河
東都轉運運使性清介聞人言貨賄輒厲聲叱之不少假而
於鹽政利弊批卻導窳具得要領嘗上議巡鹽使者力請豁
免加課略謂河東諸商築畦曬鹽出場販賣僅與淮浙竈戶
同科近日懷慶六邑又歸長蘆地勢既狹辦納尤艱今四海

昇平大兵盡撤所有軍興以來每引增銀五分應照部文題請停止至加增七分原因淮浙割沒之例謂每引加鹽二十五斤應入正額按時徵收但時勢既別張弛宜異淮浙利於鹽多河東利於鹽少故初奉部行諸商卽請認課不願加鹽且割沒之說原以示罰河東山路崎嶇轉運最難驢馱車載半出人力非若淮浙順風揚帆一瀉千里舳舻相接便於夾帶也並請題豁以懸困苦李御史時謙深嘉之亟繕疏上請獲免新加五分閱數年郝御史惟謙屢陳乞並免加增七分商民胥頌

皇恩焉鵬翮嘗念己丑之役督築城隍縣鑿四面爲運城根本其功尤稱俊偉泣任三年清望著聞擢京卿以去蘇昌臣奉天人康熙二十七年任運使精明幹濟銳意釐剔

著有鹽政策纂行世

李馥福建福清舉人康熙五十三年爲運使當鹽法初變之後持身清介裁去陋規優禮士夫講究利弊聽斷公明擢蘇松道去

劉元勳咸陽人順治己亥進士康熙間任山西糧驛道以養馬費有正供而晉皆民養嚴禁之委賑大同無漏無冒駐節地有槐一章民號爲劉公槐尋致政歸

張道祥江南徐州人康熙十三年以官生任鴈平道多惠政庚申代饑祥捐俸煮糜三所購米河東常山平價糶之全活滋眾又捐千七百元修代書院設義學蒞任十一年擢湖南按察使代人思之

吳自肅山東海豐人康熙初由進士令萬載以禽吳三桂僞

使知名累遷僉事轉分守河東道時劇賊張化金據中條山
爲州縣患自肅至論降之又爲民疏河渠廣學校歲饑出俸
設粥以救饑者在官數年績多可紀乾隆中祀名宦

李毓柱康熙間任分守雁平道廉而敏有吏材遇屬吏以禮
而不爲假借時微行訪奸猾繩以法諸郡邑疑獄未決能剖
曲直恤三關士卒預支月給米而俾於附近倉庾載之祀名
宦

曹溶字秋岳浙江嘉興進士康熙六年任陽和兵備道溶學
問閎博處兵鎖戎索間賑荒馭吏胥有績宏獎人才徐明經
化溥馮觀察雲驥皆因之知名時學政叢弊溶箝制俾不敢
逞魏敏果象梧雅參議焉尋以裁缺去仕至侍郎以上康熙時

諾岷滿州正藍旗人性耿介任戶部時稽覈有法雍正元年

以署工部右侍郎巡撫山西先是州縣侵挪錢糧者甚多岷力爲振刷相地之繁簡與員之能否互易其位以相鈎剔月要歲會胥吏無所售其奸宿弊一清正已率屬吏治民氣肅然改觀太原平陽二府所轄州縣居通省三分之二奏請改設各直隸州官民均便之州縣征收火耗向無限制奏請將耗銀提歸司庫而分給各官養廉遂爲直省耗羨歸公之始諭旨嘉其通權達變於國計民生均有裨益云

伊都立滿洲正黃旗人雍正三年以刑部左侍郎署巡撫值旱奏請發粟平糶築城西汾河護隄以防水患是冬擢雲貴總督會方改衛設縣仍留巡撫任凡朔甯二府規制悉所經畫也四年請於陽曲增倉買穀積貯其外府州要區皆擇地營建廣爲儲備調江西巡撫去及十一年歲荐饑賴所積穀

以有濟云

謝王寵甯夏人雍正元年由翰林授雁平道下車卽以察吏安民興學善俗爲首務分巡所至雖飲食亦不取給於州縣於屬吏所無瞻循關書院與諸生講論經義孜孜不倦嚴保甲黜淫祀戒浮華禁佛事一時吏治肅清士氣民風爲之一變去之日民感泣遮道攀轅者絡繹不絕累遷至都察院左都御史

湯豫誠河南儀封人由進士游擢冀甯道調任雁平清操特立惴惴無華其爲政多仿謝而疾惡尤嚴常曰惡人不除良善不安姑息養奸弗爲也故丰裁爲特峻云

以上雍正時

喀爾吉善滿洲正黃旗人乾隆五年任山西巡撫爲政不事苛察儉以自奉仁以愛民其奏請開口外煤窰招墾廠地邊

民尤利賴焉官至浙閩總督卒謚莊恪子定長亦爲山西巡撫六年之中凡再莅任亦有政聲

阿里袞字松崖滿洲鑲黃旗人乾隆八年巡撫山西值歲歉米價翔貴前撫劉於義嘗買口外米用牛皮渾脫由黃河裝運至永甯之磧口接濟太汾阿至廣其法多方招徠民食以裕十一年大同饑奏修邊縣城垣以工代賑事竣移撫山東會蒲解民變大學士訥親奉

命查辦勅後撫罷之後撫愛必禮爲阿弟而訥又其兄也乃復調山西感

上知遇倍形恪慎蒲州民與陝西朝邑爭黃河雞心灘互控詔偕陝撫陳宏謀會勘以十之六歸晉十之四給秦民耕種皆服其平十五年擢湖廣總督累官戶部尙書協辦大學士

卒謚襄壯

胡寶琮字泰舒江蘇青浦人雍正癸卯舉人乾隆十七年由兵部侍郎巡撫山西性清約精微旣貴不改眸青碧能白晝視鬼神在山西撫饑民理冤獄黜貪吏除奸豪整備關隘力行教養之政明年十月調撫湖南歷江西河南所至多惠政卒贈太子太保兵部尚書謚恪靖

明德滿洲正紅旗人乾隆二十一年巡撫山西到官卽題豁負累建倉歸綏各廳以裕邊儲定鹽池渠堰歲修法以紓民力嘗坐失察同官罌議士民千餘泣保得免後復任入境時男婦歡迎道路擁塞其得人心如此

朱珪字石君大興人乾隆戊辰進士三十二年由湖北按察使調山西明年就遷布政使奏立保固城工法令後任隨時

修護如潰在三十年內者與原築官分賠下部議行三十六年權巡撫事奏撥歸化綏遠二城穀十餘萬石搭放兵糧以省采賣而免紅朽奏免土默特蒙古私墾之罪以所墾收地三千一百餘頃許附近貧者兵民認耕納租歲得銀六千餘兩增官兵公費又奏太僕寺牧地苦寒宜改徵折色以便民除弊皆下部議行三十八年勘歸化城水災奏撫恤之生平端凝純粹於經術無所不通崖岸廉峻承宣時應得平餘鉅萬悉不取嘉慶十年累官至體仁閣大學士卒諡文正

多綸滿洲鑲白旗人乾隆十六年任布政使工書簡默厚重人稱爲多佛初壇廟皆藩司主祀多在任請主以督撫從之唐綏祖字貽雲江都舉人由縣令累官至湖北巡撫署總督乾隆十六年以事罷起用爲山西按察使性強直晚年風骨

愈峻除暴鋤奸不畏疆禦而愛民如子遇有疑案虛衷研鞠
不惜再三陳臬數載無冤獄吏胥見之不寒而慄有鐵面冰
心之號遷陝西布政使卒於官

託庸字師健滿洲人官冀甯道乾隆四年定例丁銀攤入地
畝民便之而蒲州府之萬泉解州之安邑不肯曰此地富民
無田若攤丁於地是貧民代富民完糧也征輸者以爲然仍
私用舊法十一年事上聞下巡撫議覆巡撫請如新例託爭
之不從嚴牒下府州驅迫號呼兩縣民揭竿起罷市燒城門
毀公署而堵焉巡撫憂急不知所爲命託領兵往託請單騎
獨行而暗與調兵符相機行事諾之既至先張示令自首歸
誠者赦尋以計授副將勒獻首惡七十二人時朝廷以巡撫
爲民變劾官懦

特命大學士訥親來鞠駐省城訥別訪亂民五百檄託與副將擒訊託牒稱七十二人尙多寃餘眾宜可闊略訥愈怒文書火急且曰黨惡聽參託不爲動抵攔者三五百人聞之泣曰攤丁非託公意擒七十二人非託公意我輩早從公言自首歸誠大家抱兒子臥矣今又以不擒犯故累公我山西以俠烈聞若然非壯士也請與偕出五百人竟面縛出投託託不受投副將副將受之以畏威歸順之意敢訥訥亦怒解命且保釋五百人父母妻子爭來迎歸扶攜歡呶祝延之聲數里不絕獄具前七十二人者誅三人杖十人卽調託河東道加兵備衛累官至吏部尙書卒謚誠毅

見袁枚書富察中丞被議以道員用也事在乾隆十一年袁誤七年又誤爲解州安邑五州縣而不及萬泉據蒲志刊節存之

黃祐字啟彬江西新城人由翰林擢御史乾隆十一年任雁

平平道以廉勤稱而謙抑自處不爲表襮踣厲之行後調任冀甯所至宏獎人才晉人每樂道之

劉墉字崇如諸城人大學士文正公統勦子也以翰林出爲太原知府遷冀甯道丰裁峻整習掌故達政體於吏事以勤慎著稱守太原時清積案數十購穀二萬餘石儲爲府倉陽曲令段某侵帑累萬巡撫薦遷秩去而以所虧金命墉分攤之屬縣墉不可巡撫卒自行之後事發並罹大辟

上特宥墉遣戍旋擢江甯知府累官體仁閣大學士卒謚文清喬光烈上海人進士剛方正直廉能出眾吏胥無敢稍干法紀先任河東道儉約自守不攜眷屬裁行戶緝刁民接士有吐握之風暑冀甯道未數月調直隸鹽驛道民送之數十里官至湖南巡撫

陳學穎字蓮士莆田人進士乾隆末兵備雁平喜文學每朔望必集諸生講說經義有大役輒捐俸爲倡孫忠靖公祠圯修復之並置祭田以親老乞養歸貧不能治裝士民爭遺之謝不受

以上乾隆時

周系英字石芳湖南湘潭人嘉慶十五年以內閣侍讀學士督學山西嗜學愛士宏獎風流按臨所至遇宿儒異才靡弗招致署中賓從極一時之選十六年

上幸五臺

召試迎

鑒士子中選者至十餘人皆其素拔識者也道光四年官戶部侍郎引疾歸嘉慶中學政如黃尙書鉞莫侍郎晉皆以碩學先後來晉爲時宗仰而系英所刻試牘迄今猶誦之弗衰云

劉大觀字松嵐山東邱縣人由拔貢累官河東兵備嘉慶十一年鹽政復改商運與藩司金應琦悉心籌畫招徠得宜一時稱便十四年金升巡撫旋以疾乞假侍郎初彭齡來攝撫事性煩苛以整飭吏治爲名陰排金代其位川北道劉清方以平賊功洊擢晉藩甫兩月卽被劾去州縣掛彈章者累累有迫辱至自殺者明年大觀調署布政乃撫其任性妄爲前後糾參不實諸款奏之時初已改授陝撫矣仍召歸大觀亦被議落職不以爲忤也時論偉之

以上嘉慶時

吳其濬字淪齋河南固始人嘉慶丁丑進士第一道光中由福建巡撫調山西性清簡每出僦從不過數騎革陋規禁苛派吏治肅然丙午平蒲諸郡旱饑及秋麥皆失種發倉蠲賦多方振恤民無流亡以積勞卒於官贈太子少保河東鹽務

自改簽商後重累富民後撫王某以賊敗獨其潛於節規無所染

詔褒其亮節子承恩洪恩孫搏讓並賞給舉人素博覽選於醫箸植物名實圖考六十卷卒後晉中刻以傳

薩興阿滿洲人道光中任雁平道前下車值旱徒跣行烈日中爲文禱之句注神卽日大雨民歡忭歌頌之道署久失修捐俸新之不役一民在官平易慈愛有佛子之稱

以上道光時

王慶雲字雁汀福建閩縣人由翰林官戶部侍郎咸豐初奉命查辦河東鹽務建留商改票之議引歸商領票由民販奏請定池價立口岸裁廳攤歲省浮費七十餘萬金商人額手交慶已允行矣會以籌餉事許捐免充商乃罷前議改爲官運陝省不便卽授慶雲陝西巡撫尋調撫山西通籌三省事

宜由是定爲官民並運國課益而民食亦裕七年升四川總督在晉飭吏治興文學人懷其惠及致仕歸遂卜居汾州閉戶著書爲娛起爲戶部尙書卒諡文勤

黃經廣東順德人道光甲辰進士咸豐四年任河東道值鹽政改官運悉心擘畫巡撫王甚倚賴焉性仁慈於獄訟必詳審精研惟恐稍有屈抑清苦如書生苞苴不入門民愛而吏亦畏服十年升山西按察使卒於官祀河東名宦

張錫蕃江蘇元和人咸豐元年任河東道三年率勇赴垣曲防堵八月粵逆自縣之封門口竄入城陷死之

以上咸豐時